

四庫全書

史部

欽定四庫全書

欽定南巡盛典卷八十八

名勝

江浙各名勝附識

乾隆十六年辛未

聖駕駐蹕淮安

書賜山陽縣普濟堂額曰誼敦任卹

駐蹕高旻寺

書賜棲靈寺額曰蜀岡慧照聯曰淮安奇觀別開清淨

地江山靜對遠契妙明心吉祥寺額曰智珠福祿
菴額曰福祿禪林

駐蹕鎮江

書賜三義閣額曰曲阿勝地

駐蹕江寧

書賜慧居寺額曰光明法界曰寶網長新曰精進正覺
聯曰地控秣陵金殿香浮華鬘動山盤句曲石壇
月朗戒珠圓慈應寺額曰慈應普應聯曰地近秣

陵飛法雨江連天塹聽潮音永濟寺額曰德水香
林曰江天淨界曰覺岸聯曰吳楚江山通廣望華
嚴樓閣總懸居

乾隆二十二年丁丑

駐蹕金山寺

書賜五洲山寺額曰淨因

駐蹕常州

書賜黃埠墩

觀音閣額曰水月澄觀

駐蹕惠山寺

書賜崇安寺額曰靜慧

駐蹕蘇州

書賜圓妙觀

玉皇閣額曰穆清元始三清殿額曰清虛靜妙

斗姆閣額曰珠杓朗耀又

書賜開元寺額曰靈著滄溟瑞光寺額曰慧燈無盡

駐蹕靈巖寺

書賜石佛寺額曰普門香梵聯曰願力廣施甘露味聞
思遠應海潮音海潮菴額曰海潮又

書賜三山會館

天后宮額曰德孚廣濟聯曰忠信涉波濤周歷玉洲
瑤島神明昭日月指揮水伯天吳霞漳會館

天后宮額曰祥飈慈應聯曰靈昭千里風濤看航通
絕域惠普萬帆雲影驗雅舞神霄邵武會館

天后宮額曰靈佑恬波聯曰廣著神庥錦浪平時開
素練長昭福佑彩雲飛處展靈旗

駐蹕江寧

書賜永濟寺額曰永濟宏覺寺殿額曰萬法皆如幽棲
寺額曰無去來處

乾隆二十七年壬午

駐蹕揚州

書賜救生寺額曰寶筏地藏菴額曰善因

駐蹕金山寺

書題行館畫曰海闊天空

駐蹕焦山寺

書賜海潮菴額曰會音

駐蹕常州

書賜天寧寺殿額曰龍城象教聯曰合相澄三摩光融

西竺衆香超萬有界現南藍

駐蹕蘇州

書賜圓妙觀額曰太初闡教朕曰圓筦叶三元仁宣橐
籥妙機含萬有壽溥垓埏報恩寺額曰吳雲香梵
聯曰茂苑霏春三果同叅開鹿苑祇林現瑞一峯
遙接證獅林

駐蹕杭州

書賜吳山文昌閣額曰斗匡司化

駐蹕安瀾園

書賜安國寺額曰法海安禪聯曰香水護須彌功德常

澄一鏡妙華現優鉢莊嚴合證三輪

駐蹕塘棲

書賜西塘萬壽山寺額曰本覺

駐蹕嘉興烟雨樓

書賜三塔寺額曰茶禪曰標示三乘聯曰湧塔同叅法

華品試茶分證趙州禪

乾隆三十年乙酉

駐蹕焦山寺

書賜品泉亭額曰淙雲

駐蹕蘇州

書賜圓妙觀額曰梵籟清機

駐蹕杭州

書賜勝果寺額曰勝果曰阿闍禪枝聯曰半嶺妙髮垂

翠微初上曲江毫相印淥淨平鋪

乾隆四十五年庚子

駐蹕楊家莊

書賜清江浦慈雲寺額曰慧照常圓

斗姥宮額曰璇樞佑順

乾隆四十九年甲辰

駐蹕林家莊

書賜慈雲寺聯曰綠竹紅梅猶假色行雲流水是真詮



欽定南巡盛典卷八十八

欽定四庫全書

史部

欽定南巡盛典卷八十九

詳校官通政司經歷臣郭祚熾

欽定四庫全書

欽定南巡盛典卷八十九

奏議

臣等謹按劉勰有云唐虞之世敷奏以言奏者進也言敷於下情達于上也帝王聖神廣運渙號聿頒于時百爾臣工祇服訓詞敷陳政要故在上者莫不有以進考夫為治之說而為之試其言以要其功至若時屆省方鴻儀懋舉禮俗政事教治諸

大端與夫康樂和親安平之盛軌疇咨所及羣策
畢宣斯則奏議為尤備矣我

皇上道隆千古知周萬物然猶

聖不自聖俾芻蕘一得咸可上陳

黼座以備采甄至於

法駕時巡則

沛恩膏飭吏治興文教振戎行所以懋慶賞而廣化澤

凡屬在廷之臣守土之吏無弗遵循

訓諭實力措施其間參預末議條上封章斟酌舊典隨時損益又仰邀

睿斷而奉行焉爰自辛未

翠華南莅由是而丁丑而壬午而乙酉暨庚子甲辰綜括羣議式敷

鴻猷章程明備品式咸周蓋抒忱而竭蓋者羣力之勤宣也魚聽而並觀者

一人之睿哲也皇矣偉哉亘古之宏規

熙朝之鉅典也上軼隆乎往牒下垂範乎來茲而司事
之臣忝對揚之列附名簡末其為榮幸又何加焉

謹輯

奏議第十二

欽定四庫全書

欽定南巡盛典卷八十九

奏議

乾隆十四年九月十二日兩江總督黃廷桂等奏
言竊惟省方肆覲聿昭

盛世之宏規問俗觀風動關民生之休戚我

皇上勤求治理涵育羣生

清問不輟於宵衣民隱時陳於

黼座固已

德洋恩溥遍被寰區

厚澤深仁均霑海宇而江南一省民物殷繁首推重地
尤為

聖心所眷注自十有四年以來教育生成蠲租減賦偶
值偏災早潦賑恤普逮窮簷大興水利工程沮洳
皆成沃壤凡所以為民莫室家而謀樂利者已無
隱之不周無微之不至是以羣情愛戴決隨淪肌

其瞻雲向日之誠亦倍深於他省臣等採聽風謠
諮諏輿頌咸以我

皇上民依廛念不憚勤勞前者西幸雲中晉水臺山共
仰光華之盛東巡秦岱青齊魯甸同霑雨露之膏
惟茲江淮之地帶水非遥獨不得一邀

翠華之臨幸延頸企足朝夕以祈衆口同心歡迎恐後
此實出於全省紳耆士庶之至誠臣等不敢不以
上聞者也且江省襟帶黃淮素稱澤國河工疏濬事宜

關係民生運道年來固竭力修防而安瀾未能永
奏至於水陸營制布置雖周而操防未為盡宜士
技難必精練一經

鑾輅親臨黃運河湖之全局江衝海汎之戎政悉在
聖明睿照之中諸凡修守機宜操防要領臣等親承
指示庶幾知所遵循籲懇我

皇上俯稽典禮下順輿情

恩賜俞允南巡江省覽三吳之風俗愜憶兆之歡心行

見山川草木盡荷光榮營伍河防均叨利賴臣等
與合省臣民曷勝欣切瞻望之至奏入

上諭曰大學士九卿議奏

乾隆十四年十月初五日大學士公傳恒等奏言
臣等竊以易載省方詩歌時邁書稱五載一巡狩
禮記天子巡狩望祀山川陳詩納賈周禮王巡狩
職方氏戒於四方攷職事無不敬戒風俗通曰道
德太平恐遠近不同化幽隱有不得所者故自躬

親行之此典籍所記皆以巡方為大典也洪惟

聖祖仁皇帝澤溢萬方

恩覃九有六十一年勤求治理

翠華臨幸時殷安阜之懷百千萬姓普被

鴻仁綠野歡呼屢遍江淮之域恭查康熙二十三年二月

內吏科給事中王承祖

疏請燔柴泰山過

孔林觀禮器九卿等議准奉

旨著候旨行九月由泰安登

岱致祭乘舟至江南

閱隄工抵蘇州還

駐江寧

回鑾過魯

親謁闕里二十七年九月工部尚書蘇赫奏請

臨河指示修築二十八年正月奉

諭諏吉南巡閱視中河至浙江會稽三十八年正月奉

諭黃淮為患廷臣咸請親臨指示為一勞永逸之圖二月

奉

皇太后啟行

親閱高家堰歸仁隄由蘇州

幸浙江四十年十二月河道總督張鵬翮疏請河工甫就

善後之策及應修之處請

親臨指示四十一年九月奉

諭昨年冬月河臣張鵬翮曾以河工善後之策及應修之

處請親臨指示茲當農事之隙輕裝南下自徐州一路
循視隄塘至德州

回鑾四十二年正月諏吉啟行

開河工至蘇州杭州還

駐江寧四十四年正月奉

諭黃河工竣未經親閱今欲特莅其地減從輕裝循河南

下二月

駕發京師至張家灣登舟

閱河工至蘇州松江

幸杭州四十五年正月兩江總督阿山等奏稱高家堰三壩等處河工在於泗州之西溜淮套開河工程重

大請

親臨指示四十六年正月奉

諭九卿集議再三陳請朕以諸臣之言奏聞

皇太后祇遵

慈命擇于本月二十二日啟行閱河舟楫往返不御室廬

至五月

回宮緬稽

巡省之鴻規具沛臣黎之

愷澤修防固而河清海晏永慶安瀾蠲賑頻而巷舞塗歌
齊聞擊壤采風詩則俊乂遂觀光之願宏赦宥則
吏民蒙解網之慈大川喬嶽聿隆望秩之文古聖
前王並修享祀之禮道路禁修除之擾都衢戒侈
麗之風凡茲一豫一遊莫不以休以助是以涵濡

聖澤父老猶扶杖以翹思炳煥

天章泉石亦含膏而耀采此則

聖祖之屢巡允著

熙朝之盛典者也臣等稽史冊之成憲亘古為昭誦

祖德之鴻休於今為烈欽惟我

皇上以孝法

祖以惠安民兩間之德同流四海之情必達不自暇逸時

省春秋晉地山河已燦卿雲於復旦魯郊秩祀尤

光俎豆於千年維彼江南素稱澤國治河濬澮重
興明德之思陸守水巡曲盡衛民之術前此偏災
偶告賑恤頻施既而維正輪蠲輸將盡免自東自
西自南北罔非戴高履厚之倫曰淮曰泗曰江河
尤勤就日瞻雲之願蓋受恩倍切宜望
幸彌殷此兩江督臣黃廷桂等所以有恭請

南巡之奏也且淮黃雖已底績其決排疏濬尚待
睿訓之提擻山海固屬救寧而聯絡巡防還祈

聖謨之指示此非徒封疆文武大吏願奉

屬車之清塵抑亦東南朝野諸臣莫迓

鑾輿於吉日臣等會議應如該督等所請

示期巡幸用慰輿情龍蟠虎踞之山望

六飛而呼萬歲火耨水耕之衆迎

萬乘而祝三多水利修則旱澇無憂武備飭斯干城永

賴服先疇而食舊德盡歌

有道之長沐膏澤而詠勤勞永戴

皇仁之厚矣恭候

命下所有應行一切典禮及附近隣省經由道路預備

事宜臣等交各該衙門另行詳議具奏請

旨遵行奏入

上諭恭載

恩綸

乾隆十四年十二月十九日戶部奏言據福建道

監察御史陸秩奏稱江浙兩省錢米向來昂貴錢

價每京平紋銀一兩僅易大錢七百文及六百八九十文不等米價自上年撥賑東省之後每石賣至三兩及二兩四五錢不等今歲年穀順成始得平減我

皇上痼瘕在抱念切民依將來

翠華巡幸江浙萬姓歡呼統計隨

駕官員跟隨人役以及外府外縣各鄉各鎮雲集省會之地不下數十萬人而江浙錢米止有此數一時

騰貴勢所必然查乾隆八年

駕幸

盛京

特頒諭旨將本地庫貯錢文設局官賣以平市價現有
成效可稽乞

勅諭江南督撫將運京銅劬酌留數十萬劬分發江浙
兩省錢局增加鼓鑄存貯司庫俟

聖駕臨幸屆期將一半設立官局減價變賣其餘一半

或

賞賚兵丁人役之處即將此項錢文給發泉布流通市價不能昂貴再懇

聖恩將十五年冬季應兌辛未年漕糧江浙每省截留十萬餘石亦於

聖駕抵江抵浙之時令該地方官裝載船隻在蘇州之楓橋杭州之墅河減價平糶則米價亦不致驟長以上二項只須運京腳費之需儘敷減價官賣之

數既於

國家倉庫無虧實與

巡幸地方有益奉

硃批總理行營王大臣會同該部議奏欽此臣等伏查

本年九月兩江總督臣黃廷桂等恭請

皇上南巡經大學士九卿遵

旨議奏應如該督等所請

示期巡幸用慰輿情蒙

諭依議允從南巡之舉當在辛未年春欽此今該御史
陸秩奏稱將來

翠華巡幸江浙萬姓歡呼統計官員人役以及外府縣
各鄉鎮雲集省會不下數十萬人而江浙錢米止
有此數一時騰貴勢所必然乞

勅諭江南督撫將運京銅觔酌留數十萬觔分發江浙
兩省錢局增加鼓鑄存貯司庫屆期將一半設局
減價變賣其餘一半或有

恩賞以備給發泉布流通市價不能昂貴查江蘇浙江現在開爐鼓鑄錢文充裕市價理應平減至我

皇上臨幸江浙

駐蹕省會一時人數雲集恐錢價驟昂其設局平賣之處自應預為辦理查江浙兩省歲鑄錢文除搭放兵餉外每年俱存有餘錢浙江乾隆十三年鼓鑄奏銷案內開報現在實存節年餘錢三萬八千八百餘串江蘇乾隆十二年鼓鑄奏銷案內開報現

在實存節年餘錢四萬三百餘串均未據報部動
用再加十三年以後至辛未年春約計兩省所存
餘錢共有十餘萬串以鼓鑄銅劬計算約用銅四
十餘萬劬已符該御史奏請酌留數十萬劬之數
毋庸將滇省額解京銅再為截留應將前項存貯
賤文行令各該撫如數收貯以備應用再查浙省
本年報部收買銅劬有一百四十餘萬劬江蘇有
三十餘萬劬是現在銅數均屬充裕若再量為增

鑄備用更屬有益應令各該撫卽於現設爐座內酌量通融加鑄毋庸添爐以節浮費至屆期作何設局官賣之處應令各該撫斟酌妥辦務使錢價平減其沿途經過地方亦應預為查辦毋使價昂至奏請應兌辛未年漕糧江浙每省截留十餘萬石令該地方官裝載船隻在蘇州之楓橋杭州之墅河減價平糶之處臣等伏思

聖駕臨幸江浙其隨從官員人役至各該地方需米必

多米價難免昂貴若酌截漕糧減價平糶實與隨從之官役及各該地方之小民日食均有裨益應如所奏將江浙二省乾隆十五年冬應運漕糧內每省截留十萬石以備平糶至所留漕糧應截何屬米石並截留米石裝載船隻應在何處平糶應令總漕會同各該省督撫各按地方情形妥協辦理報部查核奏入奉

旨如議速行

乾隆十五年三月十四日黃廷桂奏言竊查江蘇省寶蘇局鼓鑄青錢原設十六爐座每年正勤二十八卯鑄出錢文向係每月一成搭放各營兵餉繼因乾隆十一年銅鉛不敷當經前撫臣

題准部覆暫停八爐止設八爐鼓鑄餉錢減為間月一成搭放俟銅鉛敷裕之日仍復八爐照舊辦理續因蘇局銅鉛錫勛已敷十六爐座之用現在存錢無幾以之搭放兵餉及將來

南巡需用恐致不敷經署撫臣雅爾哈善咨明戶部將
原停八爐於乾隆十五年照舊復設鼓鑄今御史
陸秩奏請於

翠華臨幸之地截留銅觔增加鼓鑄經部議覆江蘇乾
隆十二年鼓鑄奏銷案內開報現在實存節餘錢
四萬三百餘串均未報部動用再加十三年以後
至辛未年春約計所存餘錢共有十餘萬串毋庸
將額解京銅再為截留應將前項存貯錢文行令

如數收貯以備應用再江蘇現在銅數充裕若再
量為增鑄備用更屬有益於現設爐座內酌量通
融加鑄毋庸添爐以節浮費至屆期作何設局官
賣之處應令斟酌妥辦務使錢價平減其沿途經
過地方亦應預為查辦奉

旨依議速行欽此臣伏查乾隆辛未年春恭逢

聖駕南巡隨從辦事官員人役同時畢集而外府州縣
紳士耆民心殷瞻仰亦必千里恭迎人口既多需

錢自廣仰荷

聖恩洞鑒俯允部議行令籌辦臣查江蘇省乾隆十二年鼓鑄奏銷案內原報存錢四萬三百三十三串零因十三四年減爐鑄錢不敷一歲搭放餉錢之用已將前項存錢統入乾隆十三十四兩年餉錢通融湊用現今截至乾隆十四年年底止實止存錢二萬三千六百一十九串零今乾隆十五年雖經復設八爐鑄錢但查搭放餉錢乃

皇上優恤兵丁之曠典前因減爐錢少是以減為間月
一成搭放原經曉諭兵丁俟復設爐座之日照舊
按每月一成搭放今既復設十六爐座餉錢亦應
仍照舊例按月一成搭放共計一歲需錢八萬六
千七百八十三串零以原設復設十六爐歲共出
錢九萬五千三百三十七串零計算僅存餘錢八
千五百五十四串零加之舊存餘錢二萬三千六
百一十九串零亦止存三萬二千一百七十三串

零查江省境內

車駕經臨之處自北而南共有二十三州縣道路綿長
需錢甚廣前項存錢實不敷用但若添爐鼓鑄未
免又需建房添設爐具等項誠如部議致多浮費
似應遵照部覆於現設爐座之內酌量通融加鑄
庶為允協隨經行據署蘇州布政使和其衷議覆
寶蘇局現設十六爐座正勤二十八卯之外酌再
暫行加鑄八卯歲可得錢二萬七千二百三十八

串零又查十六爐每歲應用工料價值向係支給
錢文今應按照時價庫平給銀買辦又可節存錢
二萬一千三百八十八串零連前存剩餘錢共可
得錢八萬七百九十九串零以此分發

聖駕經由之各州縣仿照

巡幸東省之例設局委員官賣足可流通平價如有餘
剩留充下年搭放兵餉之用所需添鑄銅鉛錫觔
現有存局及委員採運足數應用此項所添八卯

原為

南巡暫時需用應俟乾隆辛未年即行停止仍照舊例
二十八卯鼓鑄臣復加查核加卯添鑄不增爐座
既省建屋製具之費而錢文又得敷裕流通誠於
公事有益除經飭令照議妥辦一面咨明戶部外
至屆期作何分派設局官賣之處臣等自當籌酌
妥辦務期錢價平減以仰副

聖主念切民依之至意奏入報

聞

乾隆十五年六月十九日黃廷桂奏言竊查明春

恭值

聖駕南巡漕臣瑚寶奏辦糧艘迴避一摺奉

旨交臣辦理查瑚寶摺內議將江浙兩省起運船隻較
往年收兌開行均早二十日原屬預籌之意但江
江南北民間穫稻遲早不同有八月底九月初收
割者亦有九月半後方始收割者所以向來開徵

俱在十月初旬以後今歲開徵應飭有司運弁旋
徵旋兌徵完即可兌完兌竣即令開行均不許少
有延捱如此辦理可較往年趕早十餘日凡可以
催過宿遷者上緊催趙速挽前進其不能催過宿
遷者亦不必預先指定灣泊之處蓋緣糧船重大
風有順逆惟在臨時相度擇地停泊迴避或有帮
船一時迴避不及者即於河身寬濶處所挨次停
泊一邊恭候

御舟過後統令兼程遄行北上既無擁擠之虞又可不致遲逾仍將各幫迴避地方停泊日期報明漕臣咨部以備查考臣謹遵

旨酌議覆奏至

南巡應辦各項事宜半載以來臣等率同司道盡心籌畫定有章程悉交各該知府率同有司遵照辦理即有尚須增減之處臣等不過隨時妥酌似無遲悞所需騎坐馬匹亦已計算停妥現有滿漢標營

額馬儘可撥調足用至安設塘站之馬亦有上下
西江駟馬通融抽調如或不敷再於江西驛馬內
酌量摘撥應俟兵部行文至日即便如數派調惟
需用船隻數目難以預定但目今為時甚早俟八
九月間臣等另行請

旨備辦亦可無悞奏入報

聞

乾隆十五年七月十七日黃廷桂吉慶奏言竊照

明春恭值

聖駕南巡一切預備事宜欽奉

恩旨例應報銷者俱令動用公帑臣等督同總辦司道
逐一籌議如道路橋梁馬頭營夫茶棚等類係例
應報部者着動支藩庫錢糧

行宮名勝及附近上山道路并鋪墊陳設等類不應報
部者着動支運庫商捐銀兩均經分別飭辦惟是
地方官應辦之事甚多若不為其區畫恐致擾累

問問有事我

皇上省方問俗至意是以臣吉慶前曾面

奏請將商捐項下撥銀十五萬兩交與藩庫幫助地

方官辦理差務仰蒙

恩允今臣等已撥銀五萬兩交與江寧藩庫撥銀十萬

兩交與蘇州藩庫令其酌量動用又河務預備事

宜亦需資辦理臣等公同商酌亦撥給河庫銀二

萬兩幫辦河工差務以免派累凡動用藩庫錢糧

者由巡撫稽核照例報銷動用運庫商捐銀兩者
臣與黃廷桂公同稽核隨時登載冊籍俟

聖駕回鑾臣等將用過數目另行具

奏奏入報

聞

乾隆十五年八月十六日總理行營事務和碩莊
親王允祿等奏言據總督倉場侍郎書山等奏稱
恭查

聖祖仁皇帝南巡所乘船隻向係坐糧廳於天津收貯船

內預備

皇上明春巡幸江浙所有應用船隻自宜照例辦理惟是冬春之交河冰未開此項船隻必須於本年九月間先行駕赴宿遷庶可臨期備用謹開船單恭請

皇上派出若干隻以便委員駕赴該處伺候仍令地方官搭蓬苫蓋以蔽風雨所有外雇水手及添換旗

幘衣帽篙櫓等物容臣另行查例備辦奉

旨總理行營王大臣議奏欽此恭查從前

聖祖仁皇帝南巡所用船隻應坐糧廳承辦者俱令於天津收貯船隻內預備今恭遇

皇上明春南巡該侍郎等以冬月河冰必須於本年九月間先行駕赴宿遷開單奏請

皇上派出臣等謹按單內所開

翔鳳艇一隻大沙飛船一隻新沙飛船一隻新如意

船一隻俱係

皇上乘坐及

御用之船自應先行駕赴其餘船隻有可減省者亦有不必帶往者臣等公同酌議湖船撲拉船二項係在

御舟前行備用今於湖船三隻內酌用二隻撲拉船三隻內酌用一隻此外尚有

佛船一隻四執事船一隻清茶房船一隻又如意船

二隻看圍船二隻以上船隻南省備用甚易該督撫等自必乘便預辦無庸於天津駕送以省長途糜費再查此次駕赴南省船隻尚有應帶威虎船六隻應令該侍郎等行文內務府將應帶威虎船查交該侍郎等同

御船一并送住宿遷其應帶水手若干及添換旗幟衣帽篙櫓等物亦令該侍郎等照例辦理務於九月內委員駕赴並行知江浙督撫令其搭蓬苫蓋及

應預備各項船隻敬謹辦理奏入

上諭曰御船但令將翔鳳艇一隻送去其沙飛如意船亦不必駕赴餘依議

乾隆十五年九月十五日允祿等奏言尚書蔣溥奏預籌備貯一摺奉

硃批總理行營王大臣速議具奏欽此據稱來歲江浙等處恭遇

翠華巡幸凡

扈從官兵人等需用等物應加籌畫查黑豆一項江浙地方向不出產江南水次最近者莫如山東該省上年秋成豐稔黑豆廣收價值平賤民間餘蓄必多撥運江南取程甚便且官為買運糶賣較之商賈販運貴賤判然仰請

勅下江浙督撫會同山東撫臣將如何採買撥運並運貯何處糶賣及將來作何歸還原款之處作速商酌妥辦以期臨時濟用查明春恭遇

皇上臨幸江浙所有

扈從官兵人等馬匹應用黑豆事在必需自應預籌
但隨

駕人員在浙江地方槩用船隻所乘馬匹俱留在紅花
埠與山東境內相連所需黑豆隨地可以取給應
令山東巡撫酌量運送沂州一帶以免價值昂貴
至江浙地方需用無幾若東省撥運太多徒滋糜
費或該處調集營馬有需撥濟之處應令江浙督

撫酌用若干一面知會山東巡撫即行撥運一面
奏

聞奏入報

聞

乾隆十五年九月十六日兵部奏言查向例

皇上行幸各處一切往來本報事件俱由臺站接遞馳

送明春恭逢

聖駕南巡所有經由地方應照例安設臺站近據山東

巡撫準泰奏稱該省擬安正站十五處腰站十五處需馬二千八百五十匹臣部現在另摺核議具奏其直隸江南浙江等省作何安設之處未據該督撫等報部應請

勅交各該督撫遴委道府人員於嚮導大臣勘定經由處所并各省交界接壤地方詳加妥酌應於何處擬安正腰各站需用車馬船隻如何調撥預備逐一妥議報部臣部派員前往會同查勘安設至所

安正腰各站需用坐臺筆帖式領催等臣部照例
派往馳送如臣部筆帖式領催不敷照例行文各
部院衙門選送公同籤掣派往俟

回鑾之日停撤奏入報

聞

乾隆十五年九月十七日允祿等奏言兩江總督
黃廷桂兩淮鹽政吉慶覆奏

南巡船隻一摺奉

硃批總理行營王大臣速議具奏欽此據稱明春
南巡所有供奉

皇太后御舟

皇上御舟臣吉慶敬謹製竣又於本年現造之官船內
擇其輕便敬謹裝修三隻以備應用至

扈從人員應需船隻數目前經奏請

勅議行知到日即便遵照備辦是各項船隻俱已預備
其通州隨帶船隻如俟明年冰融開行勢必緩不

及用若於今歲即行南來又恐多費似可無庸隨帶臣查明歲恭遇

皇上南巡所有

御舟及應用船隻現據該督等俱已預脩至奏稱通州船隻似可無庸隨帶之處查本月八月內總督倉場侍郎書山等奏請酌送船隻經臣等定議奉旨酌減僅送

御舟一隻撲拉船一隻湖船二隻威虎船六隻其餘俱

已停其駕送是通州船隻原未令其帶往以省糜費至前議所帶船隻俱係隨時應用為數甚少目下河水未冰現在開行該督等所請可以無庸再議奏入報

聞

乾隆十五年十月十九日閩浙總督喀爾吉善署浙江巡撫永貴奏言乾隆十五年八月十六日奉上諭據總理行營王大臣等議奏此次南巡隨帶船隻

行令倉場衙門照議定之數預備一摺朕思該督黃廷桂等現在辦差所有恭奉

皇太后御舟及乘用各船自必先期敬謹籌備卽朕御用之舟應令酌帶亦不必按照各項名目重複辦理着傳旨詢問該督等如彼處既經辦理妥協則通州帶往船隻無庸多備况南省原係一水可通之地若江省備船足用則自江至浙何須遽為更換該撫永貴亦不必另行預備欽此又於九月初三日臣喀爾吉

善奉

廷寄總理行營王大臣和碩莊親王等奏摺一件奉
旨御船但令將翔鳳艇一隻送去其沙飛如意船亦不
必駕赴餘依議欽此恭照明春

翠華南幸江浙二省應行會辦事宜臣等於上年冬間
及今春進京

陛見路由江省業與兩江督臣黃廷桂兩淮鹽政臣吉
慶等面為商酌本年六月內又經准咨專委大員

赴蘇會商集議所有自江至浙運河內供奉

御舟已擬由江淮直抵杭城需用

扈從船隻亦從江省雇備其浙省站民各船均駕赴
江省以備差遣一應人夫水腳等費兩省仍各自
按程給發覈實報銷至於杭州西湖錢塘江及紹
興三處河道皆有閘壩大江阻隔不通臣等謹於
西湖恭備大小

御舟五隻錢塘江渡船一隻紹河

駐蹕大船三隻行駛小船一隻久經鳩工庀材敬謹成
造三處需用扈

蹕之船臨時另行僱募應用是各項船隻俱已有備所
有通州之船除已奉

旨派出翔鳳艇一隻之外臣等愚見似可無需多帶奏
入報

聞

乾隆十五年十月二十三日允祿等奏言侍郎魚

管順天府府尹蔣炳等條奏籌辦車兩事宜一摺
奉

旨總理行營王大臣議奏欽此據奏准兵部咨八旗存
京駝隻及

上駟院挑選駝共一百八十九隻尚不敷六百餘隻
行令預行僱車此項抵駝車輛請以一車抵駝三
隻請令附近之遵化玉田豐潤延慶等州縣協同
辦理并令武備院等處先期核定數目知照所有

脚價草料銀兩請於部庫支領又奏稱向來車輛
每日給銀七錢二分如遇

駐蹕之日每車日給草料銀五錢二分明歲

南巡至順河集即登

御舟由江寧蘇杭會稽

回鑾至順河集計五十餘程約六十餘日所有車輛若
令在彼守候計需二萬餘金糜費無益查八旗駝
隻緣自河南回京不無疲乏是以僱車抵駝若喂

至明年三月臚力俱可滿足應請於三月中旬空
拉緩程至順河集等候

回鑾之用其抵駝車輛無庸在彼守候又江南之王家
營山東之臺莊濟寧等處向為車輛聚集之地就
近催辦亦屬便易所有

回鑾時內務府鑾儀衛需用隨營車輛應請

勅交各該撫轉飭該州縣等屆期催備應用查抵駝車
輛原因自豫回京駝隻恐有疲乏不敷明春之用

是以該部行令該府尹等僱車抵算今查八旗駝共八百八十一隻此次

巡幸河南共用駝八百一十八隻明歲用駝之處其數大畧相等再查八旗尚有存京駝六十三隻又有上駟院駝隻途次復經添換雖自河南回京其中不無疲乏計回京後喂養兩月臆力自是滿足儘可敷用且由京至順河集不過一千數百里用以馱載亦不至於疲乏應令仍用駝隻以省僱車糜費

所有抵駝車輛令該府尹等停止添僱至所奏一車抵駝三隻等條該府尹等原因籌辦抵駝車輛起見今既仍用駝隻可以無庸再議惟內務府鑒儀衛需用隨行車輛向來不過

駐蹕之日給與草料銀五錢二分今若長令守候亦多糜費該府尹等既稱王家營臺莊等處為車輛聚集之所僱辦甚易應令隨行車輛至順河集不必守候需用之時即就近僱辦最為妥協但此項車

輒向來俱係該府尹等辦理若僅交與該省地方官催辦恐有未諳以致臨時貽悞應請將該府尹等

特派一員前往順河集會同各該督撫等董率地方官指示稽查悉心備辦如蒙

俞允臣等即行知順天府并各該撫遵照辦理奏入報聞

乾隆十五年十月二十四日允祿等奏言臣等議


覆蔣炳等籌辦車輛摺內請

旨於該府尹等特派一員前往順河集辦理車輛奉

旨依議欽此謹將府尹等職名開列恭候

欽點一員奏入奉

旨著蔣炳去



欽定南巡盛典卷八十九

欽定四庫全書

史部

欽定南巡盛典卷九十

詳校官通政司經歷臣郭祚熾

欽定四庫全書

欽定南巡盛典卷九十

奏議

乾隆十五年十一月十二日鴻臚寺奏言查定例

凡遇

皇上行幸沿途地方文武官員百里內接送明歲

皇上南巡所有沿途地方文武官員幾十里以內接送

之處謹奏請

旨奏入

上諭曰著在三十里以內接送

乾隆十五年十一月十三日總理行營事務和碩

莊親王允祿等奏言恭照明春

皇上南巡江浙所有應行預備事宜令臣等定議具奏

伏查

皇上駕幸五臺嵩山等處曾經奏准派侍衛三班前鋒
護軍一千名其各處官員兵丁各就本處差使酌

量派往所需官馬由京全數散給其大營尖營道路橋梁一應預備事宜交與地方官照例預備隨往之官員兵丁等所需米糧柴草等項令地方官聚集商賈公平交易明春

翠華南邁遵

聖祖時巡之典慰臣民望幸之心問俗省方行慶施惠一切事宜仍循舊例但江浙二省自

聖祖仁皇帝巡幸以來歷今已數十年未邀

萬乘寵臨至現在辦差及扈從官員人等俱未躬逢

盛典凡一應預備事宜若不議定章程恐致臨時有悞

臣等公同酌議三吳兩浙帶水縈紆非平原陸路可比

皇上聖駕南巡羽衛固宜嚴肅若隨從官兵太多則舳艫相接縉挽不易必宜量為酌減方可進行無滯除扈從文武大臣等應行中途留住及隨往江浙已蒙

欽派此次自京起程時侍衛仍派三班其所派三班統
於六班中揀選足額至兵丁應派八旗六百名健
銳營四百名共一千名但此次隨往兵丁中途應
行減派其江浙一路又俱乘船行走健銳兵久不
操練恐致生疎應請停其派撥所有兵丁統於八
旗內遴派前往其各處官員兵丁執事人等仍照
例交各該處視其差使之繁簡酌量揀派至江南
登舟時除差使緊要必應全行隨往外其各處官

員人等一槩量為酌減但取差使無悞而衙門執事足數承應餘俱令其留住其前鋒護軍等兵減派五百名合之江寧迎

駕兵二百名共有七百名亦足備水營差使之用其章京視兵丁之數擬派四十員以資管轄虎鎗侍衛兵丁一百三十七員名內揀選四十員名以供虎鎗差使其餘侍衛入於三班侍衛數內兵丁入於前鋒護軍五百名數內一體揀派其備帶銀兩緞

疋等項交與戶部內務府具奏備帶上船後祇須酌量敷用隨營載往所有應騎官馬人等按照應給馬匹數目仍於京中全數給發俱先支與兩箇月路費途間約計日期再行找給至江浙路程往返雖有五千七百餘里而由京至江南登船早路不過一千四五百里且馬匹俱應留住喂養儘足歇息毋庸再行更換隨

駕大臣官員應領明年春季俸銀俱於今冬十二月內

先行支放以便料理行裝至屆時

皇太后

皇上早路劄營所需大城蒙古包帳房等項俱照今秋
河南之例帶往二分工部應備黃城棧櫺等項亦
令照例帶往所用駝隻及茶膳房等處應需駝隻
車輛交與各該處照例預備

皇上至徐家渡過河至直隸廠地方留駐早營一日
閱視高堰堤工所用大城蒙古包帳房等項應先期運

往劄營等候至

皇上登舟後照臣等減定之數帶往隨行之大臣官員等駝隻馬匹等項亦俱不必過河令與留駐之官兵一體留駐仍着總管大臣哈達哈等加意管束並酌量於黃河迤北寬曠處所或分作二處或合住一處安靜守候毋許稍有滋擾至

皇上回鑾時總管大臣率領留住官兵於就近地方恭迎

聖駕其留住官兵之馬匹自行拴養外隨往江浙人等
所領官馬或交與留駐之人托其代喂或伊等各
留家人照管聽其自便官用駝隻交與山東巡撫
分給附近各州縣及綠旗官弁等喂養俟

皇上回鑾時先期趕赴等候總管大臣會同兵部照數
散給其回京所用車輛前經臣等議奏奉

旨派出侍郎蔣炳前往會同該地方官經理催備自可
無悞再查徐家渡至直隸廠

開視堤工自小五臺至揚州平山堂高旻寺等處由錢家港至江寧府由蘇州至靈巖鄧尉虎邱等處由杭州至西湖由紹興至

禹陵南鎮等處俱係旱路應需馬匹除預備

皇上所乘御馬用船載往一切必應隨帶官物交與該督撫等預派人夫擡運隨從人等所需馬匹康熙年間皆取用於地方每大臣一員給馬五匹章京侍衛官員等每員給馬三匹護軍緊要執事人等

每人給馬二匹其餘人等每二人給馬三匹現在江南浙江二省駐防官兵所拴官馬共九千八百餘匹綠營六千八百餘匹驛馬三千九百餘匹除驛馬應酌留一半以供驛遞差使外合計共有一萬八千七百餘匹此次隨往江浙大臣三十三員章京侍衛官員等六百一十一員拜唐阿兵丁等二千五百五十九名合計需馬六千六百九十餘匹除自錢家港至江寧自杭州至西湖自紹興至

禹陵等處所需馬匹均應全數散給其由徐家渡至
直隸廠早營由小五臺至揚州平山堂高旻寺由
蘇州至靈巖鄧尉虎邱等處非係緊要差使必須
隨往者俱可留於舟次不必全行此三處所需馬
匹俱應減備十分之四約計備馬四千匹即可敷
用應交與江浙督撫及京口杭州將軍等於旱路
應散馬匹之處照數預備在就近地方散給每馬
十匹之外仍多備一匹以便臨時添用其散給馬

匹時交與領侍衛內大臣兵部會同分派至上船
交馬後該地方文武官即將馬匹由陸路趕至前
途通融預備或分作二起輪流更替應付交與該
督撫酌量辦理其官員兵丁人等隨身行裝等物
有應用人夫擡運者俱令地方官聚集民夫聽其
自行僱用再查總督黃廷桂等奏請

聖駕南巡隨從人等需用船隻數日應備若干并何項
人員於

御舟前後何處行走之處請分別定議預行知會遵照
備辦等因一摺奉

硃批總理行營王大臣等議奏欽此臣等公同酌議此
次隨往江浙官兵人等雖經大加酌減若所用船
隻稍令寬裕猶恐擁擠難行擬將派出之一品大
臣三員二三品大臣九員及

御前大臣領侍衛內大臣等四員

御前乾清門行走大臣十二員鑾儀衛武備院堂官四

員或每員給船二隻或給船一隻均按其品級分別給與其侍衛官員等或每二三人給船一隻或每四五人給船一隻拜唐阿兵丁人等或每八九人給船一隻或每十數人給船一隻皆酌量其差使之緩急行檔之分合船隻之大小分別勻派除裝載物件之便民船二十五隻外統計共需沙飛馬溜船四百四十一隻即可敷用仍令其船十隻之外多備一隻以便臨時添補之用現在該省或

有預備多餘船隻俱卽令其各覓生理不必守候
屆期仍請特派大臣二三員前往會同兵部及地
方官經理其事先期各給印票按照派定船數一
一散給如有不遵定數擅行搶奪者卽行叅處至
所派船隻頭號者居多或有不敷准其大小酌量
抵算通融乘座其各項船隻行走先後次序

御前大臣領侍衛內大臣軍機大臣

御前侍衛皆係

皇上親近侍從之臣其船隻應在

御舟之前上駟院侍衛官員人等皆有伺候馬匹差使
其船隻應與裝載

御馬船隻一併在前行走批本奏事軍機處侍衛處內
閣兵部官員等皆係承辦緊要事件之員亦應令
其在前行走其餘大臣侍衛官員等船皆照舊例
在後行走若有承辦事件必應在前行走之處俱
令臨時自行奏請再管理

御舟及稽查各項人等船隻應需專管之人俟臨時奏
請於隨從之大臣內派出一二員協同護軍統領
等專司管理凡各項船隻行走及停泊之時各按
派定次序毋令擁擠再查

皇上由江南舟行至浙江應用緯夫已經遵

旨傳諭江南河道總督及江浙督撫令於河兵內撥用
該督等自應遵照辦理臣等毋庸另議至

皇上駐蹕行宮隨從官兵除應行該班值宿外其餘官

員人等如離水次在十里以內者俱令仍回各船
住宿若離水次甚遠令地方官於附近寺院歇店
及民間原有之空閒房屋酌備數處以便住宿不
許佔住民房以致滋擾再隨從官兵所需米糧柴
草等項俱交與直隸山東督撫於

駐蹕之處廣聚商人貿易不許在京客販隨營賤買貴
賣并令提督衙門及該地方官嚴行查拿至登舟
之後所需物件若往各村市購買未免往返阻滯

應交與江浙督撫等派地方官招集商販於行營
左近公平售賣至於黑豆一項前據尚書蔣溥所
奏經臣等議令山東巡撫酌量採買運送沂州一
帶以免價值昂貴至江浙地方需用無幾或有應
行撥濟之處令咨明東撫撥運業經奏准現據準
奏奏稱酌買黑豆三萬石運貯沂州一帶以供東
省支糴再買二萬石運貯臺莊水次以備接濟江
浙聽其委員領運其留養馬匹並酌買麩草高糧

以備支糶奉

硃批總理行營王大臣等議奏欽此查該撫所奏酌買黑豆運貯沂州等處分別支糶接濟之處與臣等原議相符應如所奏辦理其留養馬匹所需麩草高糧亦應如所奏令其酌量數目預期購買運至官兵留住處所以備支糶統於事竣歸還原款所有經過地方大營尖營及舟行水營并道路橋梁一切應行預備之處俱著直隸山東浙江各督撫

照例辦理又臣等伏查從前原議

皇上至順河集登舟由水路至徐家渡過河是以臣等
於議覆蔣溥蔣炳等條奏豆石車輛摺內俱即照
此定議今該督黃廷桂又奏請將順河集迤南三
站緯路改為

御路由旱道至徐家渡過河雖據稱商之兆惠等亦以
為然但是否果屬妥協應俟兆惠等回京之日奏
明請

旨遵行如有應行政換事宜臣等再行定議奏入報

聞

乾隆十五年十一月十五日閩浙總督喀爾吉善

署浙江巡撫永貴奏言本年十月十八日接准部

咨欽奉

上諭朕明春巡幸江浙所過道路橋梁該地方官現在
以次預備應遣嚮導大臣覆加查看著兆惠努三就
近自開封府馳驛前往并傳諭該督撫等一切供頓

料理務從簡樸毋得徒尚紛華以致糜費欽此臣等
遵即自省前往交界會同嚮道大臣查看於十一
月二十九日嚮道大臣兆惠努三抵浙界臣等迎
赴前途跪請

聖安後兆惠謹將面奉

諭旨備細宣示臣等一一跪聆訖兆惠努三復將沿途
道路橋梁各項俱應聽從民便不必過於開廣經
由街市止須打掃潔淨不可動民房寸椽片瓦告

知臣等臣等即會同兆惠努三聯銜出示宣布省
事便民之

聖心咸使知曉隨順道查看於初一日抵省徧閱各處
行宮景亭并西湖

御舫即渡江閱看紹郡道路暨行盤

御舟事宜畢旋省即于初八日起程回京復

命臣等恭查浙省自蒙

聖恩俯順輿情

翠華臨幸臣民無不踴躍急公願效子來之義臣等凜遵

聖訓凡有應行修建工程與應預備什物事事委員動支公項撙節辦理即如省城各項工匠因部定日給工價實不敷匠夫日食曾經

奏明照民間之例增給仰邀

睿鑒俞允浙江寔無科斂民財以致糜費情事至於一應工程浙省現任各員與閩省調來各員領銀承

辦各員皆志切急公倍求堅固整飭自願捐資加工承辦者有之臣等因其出於奉公敬事之誠加以獎勵俾抒誠悃其沿塗修做道路

營盤有必須藉用民力之處鄉民皆荷鋤舉錘踴躍赴工臣等尚令地方官各給與飯食之資不令枵腹從事此皆浙省辦理之實在情形也至浙省預備修整之道路

營盤綵牌綵亭等項臣等因杭嘉二郡遍地桑麻惟

恐有礙民業道路止就舊有緯道平治並未開闢
寬廣其看定

營盤處所有用民地修築者量其所獲花利按畝償
給俾免失業沿途綵牌綵亭等項屢據士民呈請
欲效巷舞衢歌之意臣等恐過於糜費但今就城
市總匯處所間或搭蓋業經附摺奏

聞惟是輿情難以槩行禁遏致伊等踴躍忡舞之忱無
由上達臣等惟當剴切曉諭士民切勿過於華麗

繁多以仰副我

皇上崇儉斥奢之至意再杭城內外兩處

行宮前經臣永貴在京

陛見而奉

諭旨與大學士忠勇公臣傅恒會商繪定圖式恭呈

聖覽遵即回浙與臣喀爾吉善遵照會辦雖現在一切

規模制度悉照原圖而房間門戶以及進深寬濶
丈尺不無因地制宜稍為變通處所現已將次告

竣所有臣等欽遵

聖訓并浙省實在情形謹繕摺具奏仰慰

睿懷奏入

上諭曰覽奏俱悉一切辦理妥協

乾隆十五年十一月二十四日鑾儀衛奏言恭照

明春

皇上南巡經總理行營王大臣議奏內稱

御前大臣領侍衛內大臣軍機大臣

御前侍衛

乾清門侍衛皆係

御前隨

皇上親近侍從之臣其船隻應在

御舟之前上駟院侍衛官員人等皆有伺候馬匹差使

其船隻應與裝載

御馬船隻一併在前行走及批本奏事處軍機處侍衛處內閣兵部官員等俱係承辦緊要事件之人亦

應令其在前行走如有承辦事件必應在前行走之處俱令各該處臨時自行奏請查臣衙門隨從轎輿係預備

皇上內廷并下船上岸之用所有儀仗必須臣在前排設於早晚仍行奏樂更鐘每在

御營內預備務須在前行走始可無悞如今在後行走船隻甚多擁擠一處不能無悞伏乞將臣衙門隨從轎輿儀仗樂器更鐘等項并執事人等船隻亦

與上駟院官員等一例在前行走奏入報

聞

乾隆十五年十二月十一日允祿等奏言總督黃

廷桂奏預備

南巡馬匹絳手一摺奉

硃批管理行營王大臣議奏欽此據稱明歲

南巡一切

扈從官員人等所需騎坐馬匹今於江寧鎮江兩處

駐防旗兵拴養馬匹並督撫提鎮標營額馬內共
酌調二千餘匹以之分布預備至沿途臺站業經
兵部派出司員自宿遷縣起至蘇州平望勘定正
腰各站共三十七處約設馬二千一百匹現在
咨部酌定俟部覆至日於上下兩江州縣驛馬內
抽調足用以備傳遞本摺文報之需又應用船隻
亦經預為雇備俟定有數目行知到日即於年底
新正飭令齊抵直隸廠迤南水次庶便臨時散給

至緯手人等除河兵恭備

御舟需用外其扈從人等應用緯手將通省不辦差州縣之民壯鹽快通融調用其不敷者再於沿途州縣雇備民夫恭查明春

皇上南巡所有應行隨往江浙之大臣官員兵丁人等需用船隻馬匹業經臣等酌定應需數目于本年十二月十三日具奏奉

旨依議欽此當即行文該督撫等遵照預備其緯手一

項亦屬水路必須

皇上御舟繚手已遵

旨傳諭該督撫等於河兵內撥用此外沙飛馬溜船隻
雖本船原有水手人等以供繚挽但

御舟遄行迅速隨從各船若不酌添繚手難免遲悞今
該督奏稱將通省不辦差之州縣民壯鹽快通融
調用其不敷者於沿途雇備民夫辦理已屬妥協
但在

御舟之前行走各船自應多添繚手俾其前行無滯其
在

御舟之後行走各隻僅須酌添數人即可於一日之內
挨次陸續抵泊不必多為預備應令該督酌量分
別妥辦以省僱備之繁至於沿途安設臺站以備
遞送本報等項事隸兵部既據勘定正腰各站咨
部酌定應聽該部照例辦理奏入報

聞

乾隆十五年十二月十二日兵部侍郎兼管順天府府尹蔣炳奏言竊照明春恭遇

聖駕南巡所有

回鑾時需用車輛臣欽奉

諭旨前往順河集會同江南山東督撫董率地方官備辦臣當將兩省作何分派料理咨商茲准兩江督臣黃廷桂山東撫臣準泰覆稱兩省應各分派一半至所需車價或由江南山東給發或由內務府

給發臣伏查

回鑾時所需車價約銀萬餘兩今車輛既在兩省備辦似應即由該督給發照例報銷再查兩省辦車臣應先期到彼預行料理擬即隨

駕前往合並奏明奏入

上諭曰知道了蔣炳不必隨往俟應去之時再酌量前去

乾隆十五年十二月十三日兩江總督黃廷桂奏

言竊查明春扈從官兵所需各項食物其程站如在陸路者自應於

大營附近一里外設立買賣街以便就近買用惟水路行走兩旁均係河堤緯道之外即係水田溝塍交錯舉步維艱別無隙地堪設貿易之所若於五六里或七八里之外勉強擇地設立而官兵船隻必待停泊之後始行登岸覓買時已傍晚不特往返遙遠有悞食用且恐昏暮歸船難以識認將有

終夜尋覓而不得者轉屬未便臣與司道等再三
籌計如米麵柴炭原可隨船載裝不妨多貯查沿
途如清江浦揚州鎮江蘇州均有

駐蹕日期且此四處相隔不過四五站及二三站不等
一切隨從官兵人等應請于此四處將米麵柴炭
量其足用上岸購買一次即可為數日之需至葷
素蔬菜等類難以久貯必須每日買用者查南省水
路城市相接村鎮毗連凡經過之處均有鋪戶出

賣應聽官兵隨地購買無虞缺乏臨時臣再大張
告示曉諭兵民各按本處市價公平交易不許高
擡價值抑勒強買仍揀派文武官弁所在稽查彈
壓以杜爭端所有水路難設買賣街緣由謹繕摺
奏

聞恭俟

命下臣咨會總理行營處再行一體遵照奏入
上諭曰諸凡皆妥欣悅覽之

乾隆十五年十二月十八日喀爾吉善等奏言竊
照辛未年春恭逢

翠華南幸所有沿途驛站最為緊要前經臣等詢商直
隸山東江南等省及飭行總理司道等分別查勘
彙奏謹查南北情形不同道路遠近各異自須因
地制宜變通籌辦自江省交界至杭州城內

行宮計程二百七十里分設杉青閘石門鎮塘棲鎮杭
城正站四處王江涇石門鎮安樂橋拱宸橋腰站

四處每處相離二十餘里至三四十里不等若照直隸山東等省正站設馬百匹腰站設馬五十匹未免過多今按康熙年間舊例正站各設馬七十匹腰站各設馬三十匹共設快船四十隻又自杭城渡江由蕭山江干至紹興府城麓湖村

大營計程一百里分設轉塘村麓湖村正站二處江干板橋腰站二處每處相離不過二三十里其路較近為時亦暫擬照杭嘉一帶再為酌減正站各

設馬四十匹腰站各設馬二十匹共設快船二十隻惟浙江站馬有限通省不過百匹祇敷本處差遣之用是以貼站馬共五百二十匹悉調營馬派值其餘一切乘騎備差之馬尚多亦均于滿漢各營撥用所有沿途一切棚廠槽棧以及草料遞夫等項久經預為安頓貯備不致臨期缺乏除安設營站事宜已委溫處道張九鈞樂清協副將王臣會同部員勘明報部外所有臣等辦定驛站并調

撥營馬及選用塘兵民壯緣由理合繕摺具奏奏入
報

聞

乾隆十五年十二月二十二日江蘇巡撫王師奏
言恭照辛未年春

聖駕南巡一切預備事宜經益臣吉慶會同督臣黃廷
桂具摺

奏明道路橋梁馬頭營尖茶棚等項例應報部者動

藩庫錢糧由撫臣稽核報銷

行宮名勝及附近上山道路并鋪墊陳設等項不報部
者動支運庫商捐銀兩由鹽臣稽核登簿奏

聞奉

硃批知道了欽此續准工部咨令將道路營尖馬頭
橋座供應器具什物船隻鱗夫飭令預備將現在
作何辦理之處先行報部俟差竣日核實造冊報
銷當即轉行遵照妥辦茲據布政使永寧等詳稱

道路橋梁河道馬頭營尖茶棚教場製辦絳夫水
手衣帽等項及屯駐馬騾地方并設買賣街應備
麥豆等物添雇騾頭船隻損絳等夫均係應動司
庫錢糧備辦但款項繁多必須隨時隨事酌核辦
理難以預定銀數應請仿照直隸山東辦過成例
隨時動辦事竣核實報銷再查司庫耗羨存公銀
兩不敷支給請於司庫雜稅及驛站餘剩等銀內
暫行動用俟事竣核明應銷者報部請銷應賣還

原價者照數歸款如此辦理庶免稽悞經臣與督臣一面如詳確核妥辦一面分案咨明戶工二部今准戶部咨覆雜稅耗羨等銀例應奏明動用相應遵照部文具奏伏祈

皇上睿鑒飭部查照俟事竣時臣等核實報銷再查金山

行宮對渡之錢家港係康熙年間

御舟停泊之所今年久淤墊應加挑濬深通以便停泊臣

等撥行司道詳加勘估約需銀二千餘兩現在興
工挑濬俟工竣一併確核報銷奏入

上諭部知之

乾隆十五年十二月二十三日允祿等奏言黃廷
桂奏請酌減馬匹一摺奉

硃批總理行營王大臣速議具奏欽此又喀爾吉善等
奏籌辦馬匹緣由一摺奉

硃批原議大臣速議具奏欽此據黃廷桂奏接准

廷議應備馬匹數目臣隨於通省滿漢標營內均勻
抽調照數預備派員管領又因浙省止有馬五千匹
不敷應用臣酌備馬二千餘匹屆期趕赴浙省協濟
但查此次應用正餘馬匹為數衆多沿途並無平
原空曠及寬展村鎮可以安頓此數千馬匹之地
以便飼餵者且揚州蘇州人稠地狹若安置四千
餘匹馬擁擠喧囂阻滯道路殊多未便似應請將
無緊要差使之官員兵丁並跟隨人等所需騎馬

再為酌減再查由焦山過江至象山起早至甘露寺等處回至

駐蹕之處需用馬匹似應照揚州之例一體備辦又此次經嚮導大臣勘定沿途如淮安寶應高郵丹徒丹陽常州無錫等處

車駕進城巡幸隨從官員所需騎馬因

廷議在先勘定在後未經議定統請一併定數以便遵照於前項馬內輪流預備又據喀爾吉善等奏

稱由杭州至西湖由紹興至

禹陵南鎮蘭亭名勝等處各陸路原止備

皇上遊幸所經

御道近不過二三里至十餘里惟雲棲一處最遠亦僅
二十餘里原非按站行走之旱道更鮮空曠地場
可以屯扎數千馬匹且馬多道窄恐致擁擠喧雜
臣等因南方城市馬匹馱載什物難以行走已預
備人夫擬將

御用什物敬謹損擡下至官兵行李亦用人夫搬運所需騎乘馬匹臣等擬于杭紹調集通省營馬五千匹以供乘用查臣等原議應行預備事宜以隨從人等所需馬匹康熙年間皆取用於地方每大臣一員給馬五匹章京侍衛官員等每員給馬三匹護軍緊要執事人等每人給馬二匹其餘人等每二人給馬三匹現在江浙二省駐防官兵所拴官馬共九千八百餘匹綠營六千八百餘匹驛馬三

千九百餘匹除驛馬應酌留一半以供驛遞差使
外合計共有一萬八千七百餘匹此次隨往江浙
大臣三十二員章京侍衛官員等六百一十一員
拜唐阿兵丁等二千五百五十九名合計需馬六
千六百九十餘匹除自錢塘港至江寧自杭州至
西湖自紹興至

禹陵等處所需馬匹均應全數散給其由徐家渡至
直隸廠早營由小五臺至揚州平山高旻寺由蘇

州至靈巖等處非係緊要差使必應隨往者俱可
留於舟次不必全行此三處所需馬匹俱應減備
十分之四約計備馬四千匹即可敷用應交與江
浙督撫等於旱路應備馬匹之處照數預備在就
近地方散給每馬十匹之外仍多備一匹以便臨
時添用其散給馬匹交與領侍衛內大臣兵部會
同分派至上船交馬後該地方官即將馬匹由陸
路趕至前途通融預備或分作兩起輪流應付該

督撫酌量辦理業經奏准行文知照今黃廷桂既於通省滿漢標營內均勻抽調數預備派員管領臨期自可無悞至所稱江南無平原空曠及寬展村鎮可以飼餵數千馬匹及揚州蘇州人稠地狹若安置四千餘匹馬擁擠喧囂殊多未便應請再為酌減之處臣等恭查

皇上此次巡幸江浙上船之後水程居多若遇舍舟遵陸之地

聖駕既由陸路至行營駐蹕隨從官兵若非必應隨行者已在酌減並留住之列所有大臣官員兵丁人等均有應辦差使或應先往伺候或應隨侍行走若不給與馬匹仍令乘船前往實屬緩不及事徒步追隨更恐貽誤是以臣等酌量數目分別定議於鎮江至江寧及杭州紹興等處均令全給其餘各減去十分之四不過僅取無悞差使並無多令預備之處今黃廷桂既已遵照所定馬匹數目如

數預備獨因地方狹窄奏請酌減臣等查康熙年間舊例合之現在隨從人數似不便遽行議減以致臨時周章但黃廷桂既為此奏亦必實有難于照數預備情節臣等再三斟酌應將原議每馬十匹之外多備一匹之處准其量為減省其餘應需馬匹令其隨處儘數預備如遇地方實在狹隘不能多備者或臨時將非緊要差使之大臣官員應需馬匹每員酌減一二匹兵丁人等亦各分

別減給仍照原議派領侍衛內大臣會同地方官
均勻分派如此通融辦理庶差使不致有悞而地
方官員亦無掣肘之虞矣其由焦山過江至象山
等處及續經嚮導大臣勘定所過各州縣

車駕進城巡幸所有隨從大臣官兵人等需用馬匹現
在定議一二百匹已可敷用又喀爾吉善等所奏
於杭紹二處預備馬五千匹之處查現據黃廷桂
備馬二千匹趕赴浙省協濟是該省馬匹亦可如

數預備但江浙二省情形畧同今江省既准臨時酌減浙省自應照例一體辦理俾得從容應付至所需馬匹僅供騎乘並無議及馱載若一切隨帶官物原議令該省督撫預備人夫擡運已經行知其喀爾吉善等所奏預備人夫以備損擡之處毋庸再議俟

命下之日臣等行文黃廷桂喀爾吉善等遵照可也奏
入報

可

卷之四


四

欽定四庫全書

四庫全書

卷九十

三



欽定南巡盛典卷九十